

MOZAIK



Medić: Bavio se ekstremnim penjanjem

Državljanin BiH pokušao se popeti na zgradu EU

Pokušao sam objesiti naš slogan "Subsidijarnost jeste riječ", kaže Ričard Medić...

20.05.2008. 12:32

Ričard Medić, državljani BiH rođen u Australiji, uhapšen je pri pokušaju da se popne na zgradu u Briselu da bi zvaničnicima EU i medijima promovisao svoj pokret "Subsidijarnost jeste riječ".

- Pokušao sam objesiti naš slogan na ovu zgradu da se pobrinem da pokret pridobije pažnju evropskih institucija. Ne postoji bolji način da se privuče pažnja od stvaranja mogućnosti za slučajnu smrt, izjavio je Medić, koji je portparol Skupštine evropskih regija (AER).

Medić je rekao da pokret "Subsidijarnost jeste riječ" zahtijeva uključivanje ove riječi u rječnike svih jezika.

Iako se definicija "subsidijarnosti" malo razlikuje od jezika do jezika, ta riječ se u političkom kontekstu može definisati kao "princip da se odluke trebaju donositi na nivou što bližem građanima".

- Princip subsidijarnosti je stub socijalne, teološke i političke misli vijekovima i danas se spominje u pravnim statutima, državnim ustavima i međunarodnim ugovorima. Princip je također stub AER-ove vizije žEvropa od regijaž. Evropa koja poštuje ideju stvaranja žod dna prema vrhuž i omogućava regionalnim vlastima da donose odluke na osnovu jedinstvenih potreba njihovih građana, objasnio je Medić.

Medić se pokušao popeti na zgradu bez bezbjednosne užadi da bi objesio transparent od 60 metara kvadratnih na kome se nalazi slogan "Subsidijarnost jeste riječ".

Ta zgrada gleda na kancelariju predsjednika EU Jose Manuel Barrosa u sjedištu Evropske komisije.

U prisustvu evropskih medijskih kuća, Medića su uhapsile specijalne snage belgijske policije prije nego je uspio da objesi transparent. On je u pritvoru proveo sedam sati.

Medić se bavio ekstremnim penjanjem po krečnjačkim stijenama u Hercegovini, a bio je i portparol OEBS-a u Mostaru.

Autor: Srna